

Filipai

¹ Pol ado Timoti, Kristus Jesus nē ferfer,

Filipai oun Kristus Jesus bun Negur nē tamo kayau ganan ado, uyu iroudiya ado uyu iroudiya farumen sios kabī daledig anidi bun pas enei matotof.

² Neda Tamada Negur ado Odug Jesus Kristus bunem, wau ifenēya ado wau inosiya ā bun ibodōf.

De Fiyēya Ado Kosēya

³ Sain aya ā nigin karī aulef ganan bun, aya neu Negur de afiyēdig.

⁴ Ā ganan nigin neu kosēya ganan bun, aya sain ganan bun wau kulīya ado kosē audig,

⁵ ere nigin, ā gariya bunem biya od nigin, amā geid uyu kū ta tasin isi, gama sain enei bun.

⁶ Aya enei nigin momoi auf, are takā ī ā namein kabī biya gariya inon are, tokō fel ile, Kristus Jesus nē naa bun idikalauf.

⁷ Aya ā ganan nigin eig afe kisi afef, are tutuk, ere nigin, ā neu wau bun ufaregef, ere nigin, aya kalabus bun be abodok, biya od asen ken, kurō afeis fen megeir afef bun, ā ganan Negur nē wau ifenēya bun, aya geid tabodōgedig.

⁸ Kristus Jesus nē wau laa fiya bunem, aya ā ganan nigin wau naig be fe laa fedig, are Negur ī keleī.

9 Enei nigin aya kosē auf, are āgenei wauī laa fiya anī, keleī ado es fiya kisi ganan bun, odugef ilauf,

10 anī bunem, ā ereb biya bagai ya es fiya kelei ken, ā karētut fen, od sā ubodōgef uleg, Kristus nē naa bun wō gouf,

11 ago ge di, madur bagai nē faat Jesus Kristus bunem isif anī, ā bun barikāf, anī bunem, Negur ī fula fiya medeÿa ado yana yaleseya yalouf.

Pol Kalabus Ibodon Anim Biya Od Fou Yelen

12 Turau tar, gama aya ā enei keleī youf anī orouf, ereb aya bun wō yen anim, biya od el fe isennē di, fou yelen.

13 Anī bunem, Sisa* nē fō lo fiya tamo ganan ado tamo kayau ganan idi, aya Kristus nigin kalabus bun abodok ya anī keleī.

14 Aya kalabus bun abodok anī bunem, neu turau tar musei ganan, Odug bun dibodok idi, Negur nē od nigin, totol ado kumī sā, wogō douf nigin waud yalesen.

15 Momoi, tunī kiyeī ado kiwai bunem Kristus nigin wogō dedig, anī ere, tunī kisi biya bunem age difedig.

16 Idi kisi biya bunem age difedig anidi, wau laa fiya bunem age difedig, are aya biya od asennen bunem kalabus bun abodok anī idi keleī.

17 Idi kiyeī ado kiwai bunem age difedig anidi, kisi karētut ban, dogo yeneid nigin de fen, Kristus nigin wogō def, are sain aya kalabus bun abod mog, morō aya bun tobol fiya nigin de fen age difedig.

* **1:13:** Rom neid king odug.

18 Anĩ ere, ere naig fouf? Ereb odug bagai are, naab ganan bun, kisi kũ fenẽya bunem be, kisi tutuk bunem age difef, are Kristus nigin wogõ def. Anĩ age dife di, aya wau al fef.

Momoi, aya neu wau al fiya tokõ afalauf,

19 ere nigin, aya keleĩ, āgenei kosẽya bunem ado Jesus Kristus nẽ Awa Uurem isennẽya bunem, ereb aya bun wõ yen anim, aya kaffi fiya bun tamal yaelnauf.

20 Aya totol bagai kisi afe fen, wau irok, are aya naab taka bunem to mama fiyauf, anĩ ere, aya kumĩ sã totol barikã ano di, Kristus ĩ, sain ganan age fedig gen, gamag neu bouwau bun, mata ibodõya bun be laa buneg, yana ilun iselauf.

21 Ere nigin, aya bun, mata ibodõyauf are Kristus nigin, laa fiyauf areg aya biya alouf.

22 Aya fau bouwau bun mata abodok alauf are, aya faat biya yûf nigin kabî alouf. Anĩ ere, ere anĩ aya dõ afouf? Aya keleĩ sã!

23 Aya uru anidim si sitakã dĩ difiyaf. Aya ile, Kristus ado ibodõya nigin orouf, are gai biya bagai,

24 anĩ ere, aya bouwau mata ibodõf are, ã nigin biya bagai youf.

25 Aya enei nigin momoi bagai au fen, aya keleĩ, aya fau abodõf, age afe fen, aya, āgenei momooya biya ilauf nigin ado ã momooya bun wauĩ kulĩ youf nigin, ã ganan geid tabodõf.

26 Age fe di, aya ã geid baban tabodõf anĩ bunem, aya bunem, āgenei wauĩ kulïya Kristus Jesus nigin ise gogû fouf.

27 Ereb wõ youf, Kristus nẽ biya od kisin bagai

ereb ereb ago gouf. Anī bunem, aya asi ã ailiyeif be, aya ã atun ibodöya sa ken karī be dogol auf, aya keleī youf, are ã uur tekelei bun totol ufareg fen, biya od nē momooya nigin tamo tekelei gen, bagug fen, kabī totol walogouf.

²⁸ Idi naab fire fire bunem, kiwai difeneif anidi nigin, ã kumī sā ufaragauf. Are idi bun, idi daū feidlauf anī nē uris, anī ere, ã bun, Negurem ã kel yaleyeif anī nē uris.

²⁹ Ere nigin, ã Kristus nigin momoi gouf nigin dogol, Kristus aruna yaleya nē el fiya to ifenein, anī ere, ã ï nigin daraug walogouf nigin ifenein.

³⁰ Æ aya kusī aun ulegen, gamag fau kusī auf karī gef anī, ãg ago gef.

2

Kristus Nē Wau Yukesileya Anī Madē Gouf

¹ Anī nigin, ã Kristus bun wauī yaleseya adouf are, Kristus nē wau laa fiya bunem wauī yo fiya adouf are, Awa Uur geid nigal yūya adouf are, molol ado wauī yūya adouf are,

² neu wau kulīya anī, wauī tekelei, wauī laa fiya tekelei, uur ado kisi bun tekelei bunem tobol ge di, neu wau kulīya barikāf.

³ Aug nigin dogol be, ege yeneif yaleseya bunem ereb taka to ago gouf, anī ere, wauī yukesileya bun, ã aug nigin kisi gef anī wal fiya, taka nigin agog kisi gouf.

⁴ Æ mugu mugu ãgenei biya fiya nigin dogol to kisi gouf, anī ere, tunī neid biya fiya nigin neg kisi gouf.

⁵ Āgenei tobonuneī, Kristus Jesus nē ado tekelei youf:

⁶ Ī yogo Negur bagai,

anī ere, ī Negur gen ibodōya anī itoron,

⁷ anī ere, ī yogan kisi ganan yukalaisil fen,

ferfer gen ibod ken,

tamo bagai gen wō yen.

⁸ Agef fen, tamo bagai gen wō ye mog, dilen.

Ī yogo wau yukesil fen,

laa nigineg sigor dō fen, agef fen, aa tetek buneg laa fen!

⁹ Anī nigin, Negur ī ilun bagai yaleselne ken,

ī yana, yana ganan wal fiya anī ifenen.

¹⁰ Age fe di, Jesus yana anī bun, iboreid ganan bobou difouf,

saa ilun ado, tenebur ado, teneub farumeneg.

¹¹ Age de fen, sigoreid ganan kurō difalaisi, Jesus

Kristus ī Odug de fen,

Tama Negur fula fiya medeīya difenēf.

Barisa Gegen Fula Fiya

¹² Anī nigin, neu oboiyou tar, aya malau bun dogol sā, anī ere, fatuk bagai aya ā geid to tabodok buneg, ā gai dō gedig gen, āgenei kel yaleya nigin, kumī ado tererēya bunem, kabī totol walogouf,

¹³ ere nigin, Negur nē kisi biya kilei, ā kisig fen, dō gouf nigin, Negur ī ā namein kabī yaledig.

¹⁴ Ereb ereb ganan, nauseirya sā, monēya sā bunem, ago gouf,

¹⁵ ago ge di, ā bouweī od sa ken, karētut bagai, tenebur tamo kayau waud gogileya ado sane

atun, Negur gere tar kū fenēya sā wowā gouf, ã idi atun owōbē barisa gegen fula gouf.

¹⁶ Mata ifenēya nē od uroug kafī walagauf, ago ge di, aya Kristus nē naa bun, aya ege to gudu raun be kabī alen anī nigin, yanau alesauf.

¹⁷ Anī ere, aya, āgenei momoiya anī nē sesewi fiya ado aruna yaleya bun, wain ofa gen, naudou fi falaufeg, aya wau al fe fen, ã ganan geid wauda kulī youf.

¹⁸ Anī nigin, āg wauī al fe fen, aya geid wauda kulī youf.

Timoti Epafroditus Ado

¹⁹ Odug Jesus bun, aya Timoti ã bun kaisā bagai sur fiya nigin, wau isef, are aya ã nigin od ale fen, ayag wau al fouf nigin age afef.

²⁰ Aya ein, aib taka ī gen, āgenei biya fiya nigin wau fāya anī to ailen.

²¹ Ere nigin, ganan dogo nigin dogol kisi difedig, Jesus Kristus nē biya fiya nigin to kisi difedig.

²² Anī ere, ã keleī, Timoti ī yogo nigin yaor fen, ere nigin, ī aya urom, kesu yogen tama ado gen, biya od nigin kabī malen.

²³ Anī nigin, aya bun ereb ereb naig fe wō youf anī ail fen, ī ã bun kaisā bagai sur fiya nigin, wau irok.

²⁴ Age afe fen, aya Odug bun momoi auf, aya Yug kaisā bagai asiyouf.

²⁵ Anī ere, aya kisi afef, aya Epafroditus ã gein baban sur afiyēf are deuf auf, ī neu turau, neu kabī turau ado, kusī tamo turau, īg āgenei soosi tamo, ī ereb aya lau afef anī kulatun fiyauf nigin sur wiyēgen anī.

26 Ì ã ganan ileyeňa nigin wau fatuk bagai irok, agef fen, ï dagi ado ya anĩ karĩ gen bunem wau morõ ado.

27 Momoi ï dagi fen, laaf genen. Anĩ ere, Negur ï nigin wau yun, ï nigin dogol sã, aya nigin neg wau yu ken, aya wau gudũ fiya teten, wau gudũ fiya baban to alouf nigin age fen.

28 Anĩ nigin, aya ï sur fiyëya nigin wau totol bagai irok, age afe di, sain ã ï baban uleg fen, wauï al fe di, aya wau morõ are wau warasa youf.

29 Ï Odug bun wauï al fiya odug bunem aan wiyëgouf, agog fen, tamo ï gen yeneid wale-sagauf,

30 ere nigin, ï Kristus nẽ kabĩ nigin laaf genen, ï ã aya isennëya ifanaya kisi feleya sã anĩ, aya ifanauf nigin, yagon bou itoron.

3

Bouwa Nẽ Oroya Nigin To Momoi Ge

1 Od idïya nigin, neu turau tar, Odug bun wauï kulï ye! Aya ã bun de tekelei enei baban itotoya nigin morõ sã. Are ã kulatun yeňa nigin, age afef.

2 Gaũ anidi nigin lo walagauf, tamo idi sane age difedig, idi mulũ ileya nigin bouweid gudũ difedig anidi.

3 Ere nigin, ada anĩ mulũ telen, ada anĩ Negur nẽ Awa Uur bunem Negur yana talesedig, ada anĩ Kristus Jesus nigin yanada talesedig, age ta fen, ada bouwa nẽ oroya nigin to momoi taudig.

4 Anĩ ere, aya yug bouwa nẽ oroya bun yanau yaleseya nigin gariya ado.

Aib taka ī bouwa nē oroya bun yana yaleseya nigin gariya ado youf, aya ī wal fiya.

⁵ Naa eit bun aya mulū elen, aya Israel tamo, Benjamin nē ibor bun tamal, Hibru tamo bagai, aya lo bunem Farisia tamal,

⁶ aya Negur nigin au fen, kabī totol aledig, age afe fen, sios darau afenēdigid, lo dō fiya bunem madur bagai wōyā nigineg, aya bouwau bun od sā.

⁷ Anī ere, ereb ereb anī ganan aya isennauf aun are, Kristus nigin au fen, atoron.

⁸ Anī dogol sā, neu Odug Kristus Jesus nigin keleīyā anī, ereb ereb ganan wal feid fen, odug bagai nigin, aya ereb ereb ganan are ege auf. Aya ī nigin ereb ereb ganan ator ken, sisik gen kisi afef, are aya Kristus anī ale fen,

⁹ ī ado bagu mafouf nigin age afen. Neu madur bagai aya bun ibodok are, lo bunem isiya sā, anī ere, madur bagai Kristus nigin momoiya bunem isif, are madur bagai Negur bun tamal momoiya bunem isif.

¹⁰ Aya, Kristus nigin, yagon mata kel fāyā nē megeir nigin ado, yagon darau bun ifareya nigin kelei ken, yagon laa bun ī gen wō auf nigin orouf,

¹¹ are aya laa bun tamal kel fāyā anī alouf nigin age afef.

Pol Ī Daū Bun Wōyā Nigin Gudu Ren

¹² Aya enei ganan mogo alen be, kisi feleya bagai wō aun gen to kisi afef, anī ere, aya, ereb aya yaleya nigin Kristus Jesus igirnan anī, yaleya nigin totol bagai gudu rauf.

13 Turau tar, aya anī mogo alen to auf. Anī ere, erek aya age afef are, erek aya dudum afen are wederou tu kel fen, erek malabag ifaref anī bun gudu rauf.

14 Aya, mala solo Negurem saa ilunem Kristus Jesus bun iweignan anī, alouf nigin daū bun gudu rauf.

15 Ada atīya wō taun ganan, eig ya dogol kisi tafouf. Ā kisi tunī nigin fire kisi gouf, areg Negur ā bun yaor fouf.

16 Anī ere, erek ada mogo talen anī dō tafouf.

17 Turau tar, ā tunī geid bagug fen, aya dō wiya-gauf, agog fen, ā, idi amā tobonunā mafelnein bun difaref anidi dō wedigouf.

18 Ere nigin, aya mogo sain musei arokeneik asin anī, gama baban maru isi fen arokeneik, musei idi Kristus nē aa tetek nigin kiwai dibodok.

19 Idi neid idikeleya are daū feleya bun, idi neid waitou are dogo neid naumeid, agef fen, dogo neid fula fiya are dogo neid mama bun ibodok. Dogo neid kisi are tenebur nē safina bun ibodok.

20 Anī ere, ada neda ibodōya modoū are, saa ilun ibodok. Agef fen, ada kel yaleya tamo Odug Jesus Kristus an tamal fatuk bagai tari tafe.

21 Kristus ī, erek ereb ganan ī farumen irouleya nē megeir bunem, ada bouwada tenebur nē enei falei fele di, ī yagon bouwa fula fiya medeīya gen wō douf.

4

1 Anī nigin, neu turau tar, aya ā nigin wau laaf fen, kisi totol anodig, ā neu wau kulīya ado teter.

Neu oboiyou tar, ã Odug bun agog ufareg, megeir lauf.

Wau Yaleseyea Od

² Aya Yuodia õ agonok, Sintike õg agonok, ã Odug bun wauĩ tekelei youf.

³ Kabĩ turau bagai, aya õ arokonok, kayau eneidi biya od nigin aya isennaya nigin kabĩ totol daledig anidi usenneid fen, Klemen ado neu kabĩ turau tar ganan, dogo neid yeneid mata ibodõya nẽ buk bun ifaref anidig, usennëdiyouf.

⁴ Sain ganan Odug bun wauĩ kulĩ youf. Aya baban arokeneik: Wauĩ kulĩ ye!

⁵ Ägenei molol anĩ tamo ganan bun yaor gouf. Odug ï mogo melsak.

⁶ Ä ereb taka nigin to suwẽ gouf, anĩ ere, ereb ereb ganan bun, kosõya ado to fiya bunem, Negur de wiyẽg fen, ägenei to fiya Negur bun unogouf.

⁷ Ago ge di, Negur nẽ wau inosiya tamo nẽ karïya ganan wal fiya anim, Kristus Jesus bun, ägenei wauĩ ado ägenei kisi kulatun fediyouf.

⁸ Od idïya nigin, turau tar, ereb momoi anĩ, ereb biya anĩ, ereb madur anĩ, ereb karëtut anĩ, ereb wau laa fiya nẽ anĩ, ereb yana iseleya nẽ anĩ, ereb taka biya bagai fen, yana iseleya nẽ bagai anĩ, ereb ereb age fiya nigin kisi gouf.

⁹ Ereb aya bunem ã kelein, walegen, karĩ gen be, aya bun ulegen anĩ, agog dõ gouf. Ago ge di, wau inosiya nẽ Negur, ã geid ibodõf.

Pol Idi Neid Ege Luwa Nigin De Fiyëdin

¹⁰ Gama ã aya isennaya nigin baban kisi fã yen nigin, aya Odug bun fatuk bagai wau kulĩ yef.

Momoi, ã aya isennaya nigin kisi gen, anĩ ere, ã anĩ yaor fiya nigin naab taka to wõ yen.

¹¹ Aya ereb lau afef nigin, enei to orok, ere nigin, sain naig be fe isiyoufeg, aya wau inois ibodõya nigin kelein.

¹² Aya maleg bun ibodõya are aya keleĩ, aya safina ado ibodõyag aya keleĩ. Nain be, ereb sain naig be fe wõ youf bun, aya nameu isokosauf be, naũ abodõf, aya safina musei ado be, aya safina naal bagai adoufeg, aya wau inois ibodõya nẽ waa are aya kelein.

¹³ Aya ereb ereb ganan, ĩ aya megeir ifanadig bunem, sã age afouf.

¹⁴ Anĩ ere, aya neu morõ bun isennaya nigin kisi gen are, ã biya ago gen.

¹⁵ Filipai tamo kayau ã gai keleĩ bagai, aya Masedonia provins ator ken, asi, biya od uyulil wogõ ayein sain bun, sios takam safina yaleya bun be, ifenẽya bun to isennan, ägem dogol.

¹⁶ Sain aya Tesalonika taun abodoneg, ã safina aya isennẽya nigin aya lau afe mog, baba baban sur wanagen.

¹⁷ Aya safina ege luwa yaleya nigin to kisi afef, anĩ ere, aya ägenei dumen mala solo biya walogouf nigin kisi afef.

¹⁸ Aya ereb ereb ganan kisi feleya ale fen, anĩ wal fiyag alen. Aya fatuk bagai wanagen, gama aya Epafroditus bunem safina fire fire ege luwa sur gen anĩ alen. Anĩ ganan are, sesewi fiya sumeĩ biya ado anĩ, Negur wau al fiya ado yalouf.

¹⁹ Agef fen, neu Negur ĩ, Kristus Jesus bun, yagon kisi feleya fula fiya medeїya barikã bunem,

ãgenei lau gef ganan ifeneñf.

20 Neda Tamada Negur bun fula fiya medeñya gai gai ibodkalauf. Momoi.

Idikeleya Nē Aanya

21 Kristus Jesus bun Negur nē tamo kayau ganan aan wiyēdigouf. Turau tar aya geid mafaref anidim aanya sur difef.

22 Negur nē tamo kayau ganan, ã bun aanya sur difef, idi atun, idi Sisa nē ibor bun kabī daledig anidim bagai anī, ã bun aanya sur difef.

23 Odug Jesus Kristus nē wau ifenēña ãgenei uur bun ibodōf. Momoi.

**Mata Ifenēya Nē Od
The New Testament in the Marik Language of Papua
New Guinea
Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 18 Mar 2025 from source files
dated 31 Aug 2023

d7099f9d-3bdf-5620-8eb3-7e6c51cab7ea